

雜言古詠

樂府

五言律詩


七言律詩

元逸山集

五之八



16
2700
3



門 16
2700
3

遺山先生集卷第五

元張德輝頤齋類次

平定後學張穆頤

校梓

雜言

去歲君遠游送仲梁出山

去歲君遠游。今年客它州。青天萬古一明月。只與行人生暮
愁。問君游何許。情多地退兮。偏處處。金鞭斷折。驥死萬里
長鴻思一舉。憶初識子梁。王臺清風入座。無纖埃。華嶽峯尖
見秋隼。金眸玉爪不凡材。西園日晴花滿煙。五雲樓閣三山
巔。玉樹瑤林照春色。青錢白璧買芳年。三年一夢南陽道。汴
水迢迢入秋草。拏雲心事人不知。千首新詩怨枯槁。破屋仰
見星。疏衾風露清。匣中有長劍。爲君鳴不平。泥途久辱思一
濯。去去舉足皆清冷。鄧州大帥材望雄。愛客不減奇章公。軍

昭和十一年
二月十三日
碑

中宴酣笳鼓競。銀燭吐焰如長虹。幕中多士君又往。談笑已
覺南夷空。東州春回十月後。梅華分香入春酒。平生得意欽
與京。青眼高歌望君久。浙江南下青法。石門細路蒼煙屯。
五松平頭白日靜。千山萬山如亂雲。菊源不逐時事改。芝嶺
自與商顏鄰。他日相思一回首。漁舟時問武陵人。
欽謂欽叔也。樂天書以微之爲微。

此日不足惜

此日不足惜。此酒不可無。頗怪昌黎公。亦復爲世儒。天生至
神物。與人作華胥。一酌舌本彊。二酌燥吻濡。三酌動高興。四
酌色敷腴。連絲五六酌。枯腸潤如酥。眼花耳熱後。萬物寄一
壺。十酌未渠央。百觚亦奚拘。人生一世間。忽若過隙駒。有酒
不解飲。問君誰與娛。君不見東家騎鯨李。膽滿六尺軀。萬言

黃石策。八陣夔州圖。酒酣起舞不稱意。長吁青雲指夷吾。又
不見西家紫髯郎。老氣雄萬夫。狂歌飲燕市。擊筑聲嗚嗚。倚
天長劍插少室。頗欲四海皆東湖。鷹揚虎視今焉如。河山永
隔黃公壚。銜杯直待秋井塌。青苔白骨憐君愚。少年覓計生
白鬢。捫參歷井無危途。榮不滿睫良區區。就令一朝便得入
州督。爭似高吟大醉窮朝晡。餘名安得潤枯骨。四十豈不知
頭顱。此日不足惜。此酒不可無。太虛爲室。月爲燭。醉倒不用
春風扶。

送希顏赴召西臺兼簡李汾長源

昨日游崧邱。今日西臺行。勞生好夢亦大小。枕中馬嘶車鐸
鳴。山林之樂無虧成。胡爲解蘭縛塵纓。蒼生望君須一起。我
知無地逃功名。關中得君作金城。氣象已覺西山平。諸人誰

送山先生集 卷五 二
出仲卿右。一座想爲相如傾。風華浩蕩春冥冥。馬頭僊掌遙
相迎。長安市上見李白。爲我一醉秦東亭。

嵩山玉鏡

玉鏡見何許。今旦東山陞。積雨洗昏霾。旭日發光輝。光輝奪
人目。灑灑如動移。初如秋月圓。漸如曙星微。曙星不能久。併
與晨露晞。此鏡何從來。造化秘莫窺。山精或寶氣。恍惚令人
疑。誰爲問岳祇。山川英秀會有歸。不能生申與甫。瑞王國萬
丈光芒徒爾爲。

虎害

北山虎有穴。南山虎爲羣。目光如電聲如雷。倚蕩起伏山之
垠。百人一飽不畱骨。敗衣墜絮徒紛紛。空谷絕樵聲。長路無
行塵。呀呀垂涎口。耽耽闕城闐。天地豈不仁。社公豈不神。哀

哀太山婦。叫斷秋空雲。可憐封使君。生不治民死食民。世上
無復裴將軍。北平太守今何人。

飲酒

江南秋泉雲液濃。遼東抹利玉汁鎔。椰瓢朝傾荔支綠。螺杯
暮捲珍珠紅。此酒誰所畱。今日乃汝逢。僊人一九藥。洗我芥
蒂胸。金沙一散風雨疾。世事盡與浮雲空。東家劉伯倫。西家
王無功。醉鄉日月萬萬古。眼中擾擾誰爲雄。人會有歸盡飲
不飲所同。所恨獨醒人。百年枯槁中。獨醒恨未通。獨醉恨未
公安。得清江變醇酎。盡回天地入春風。

送高信卿

高卿去歲山中居。椽朝栗暮分猿狙。今年移家入城市。甌中
生塵釜生魚。文窮智亦窮。五鬼更嘯呼。迺翁延客著上座。兩

兒已復遭擲。掄三冬兔園冊。牧豎叫語麤。溼薪煙滿眼。破硯
冰生鬢。賣符與行藥。不養堂堂軀。無衣思南州。千里走單車。
我嘗相夫君。不是山澤臞。十八學擊劍。二十了陰符。平生結
友王與李。袖中頗有魚。麗圖文武志。膽誰不如。不能拔劍斫
蛟鱷。亦當赤手降於菟。胡為堅坐守寒饑。坐令兒女悲窮途。
萬事餽塗酒。一壺別時聊為鼓。隴胡中原麟鳳今如此。莫道
皇家結網疏。

寄趙宜之趙時在盧氏

大城滿豺虎。小城空雀鼠。可憐河朔州。人掘草根官煮弩。北
人南來向何處。共說莘川今樂土。莘川三月春事忙。布穀勸
耕鳩喚雨。舊聞抱犢山。摩雲出蒼棧。長林絕壑人迹所不到。
可以避世如武陵。煮椽當果穀。煎朮甘飴餽。此物足以度荒

歲。況有麋鹿可射魚。可嘗自我來嵩前。旱乾歲相仍。耕田食
不足。又復違親朋。三年西去心。籠禽念飛騰。一瓶一鉢百無
累。恨我不如雲水僧。崧山幾來層。不畏登不得。但畏不得登。
洛陽一管秋風起。羨煞吳中張季鷹。

段志堅畫龍為劉鄧州賦

豬龍可參亦可屠。世人畫蛇復畫魚。天飛忽入阿堅筆。始覺
眾史欺庸愚。腥風萬里來。白浪橫江湖。一麾走海若。再顧失
天吳。浩蕩明河翻。尾鬣慘不濡。只愁紙上出雷火。搏控大千
如此珠。天生神物與化俱。滅沒變見何所無。逆鱗自古不受
觸。乃今縮頭隨卷舒。怪得堂堂髯御史。平生長有雨隨車。

送詩人秦略簡夫歸蘇墳別業

三月不見君。渴心欲生塵。論文一尊酒。雅道誰當陳。昨朝見

君臨水句乃知抽青配白非詩人。南山明月北山雲。恨君不作由東鄰。擊鮮為具非無好事者。天隨杞菊年年新。石田茅屋連蘇墳。兩兒力耕足養親。君詩或者昌晚節。不應道路長。遂遂白髮刀騷一幅巾。豐年鄉社樂間身。蹇驢駝入醉鄉去。袖中知有眉山春。

紀子正杏園燕集 甲午歲

紀翁種杏城西垠。千株萬株紅豔新。今年寒食好天色。曉氣鬱鬱含芳津。天公自愛此花好。朝薰暮染煩花神。融霞暈雪一傾倒。非煙非霧非卿雲。未開何所似。乳兒粉妝淡絳脣。能啼能笑癡復驗。畫出百子元非真。半開何所似。里中處女東家鄰。陽和入骨春思動。欲語不語時輕顰。就中爛漫尤更好。五家合隊號與秦。曲江江頭看車馬。十里羅綺爭紅塵。陽平

一邑多詩豪。主人買酒邀眾賓。花時有成約。恨少楊子張。吾軍落花著衣紅。繽紛四座慘澹傷精魂。花開花落十日耳。對花不飲花應嗔。愛花常苦得花晚。爭教行樂無間身。芳苞一破不更合。且看錦樹烘殘春。

送李參軍北上

五日過居庸。十日渡桑乾。受降城北幾千里。出塞入塞沙漫漫。古來丈夫淚。不灑別離間。今朝送君行。清涕留餘潸。生女莫作王明君。一去紫臺空佩環。生男莫作班定遠。萬里馳書望玉關。我知驥子墮地無齊燕。我知鴻鵠意氣青雲端。草間尺鷃亦自樂。扶搖直上何勞搏。一衣敝緼袍。一飯苜蓿盤。歲時壽翁媪。團欒有餘歡。就令一朝便得入州督。爭似綵衣起舞春爛斑。去年雒陽人。今年指天山。地遠馬羈服。霜重貂裘

寒朔風浩浩來。客子慘在顏。捫胡嶺上一回首。未必君心如
石頭。君不見桓山鳥。乳哺不得須臾間。眾雛一朝散。孤雌回
顧聲悲酸。寒雁來時八九月。白頭阿母望君還。

王黃華墨竹為郭輔之賦

古來畫竹尊右丞。東坡斂衽不敢評。開元石本出摹寫。燕市
駿骨留空名。亦有文湖州。畫意不畫形。一為坡所賞。四海知
有篔簹亭。淡衣幅巾老明經。老死不敢言縱橫。豈知遼江一
派取後出。運斤成風刃發硎。雪溪僊人詩骨清。畫筆尙餘詩
典刑。月中看竹寫秋影。清鏡平明白髮生。娟娟略似萱草詠。
落落不減叢臺行。千枝萬葉何許來。但見醉帖字敬傾。君不
見忠恕大篆草書法。趙生怒虎巽墨成。至人技進不名技。游
戲亦復通真靈。百年文章公主盟。屏山見之踞且擊。聲光舊

塞天壤破。議論今著兒曹輕。有物於此鳴不平。悲耶嘯耶誰
汝令。只恐破窗風雨夜。怒隨雷電上青冥。

汎舟大明湖待杜子不至

長白山前繡江水。展放荷花三十里。看山水底山更佳。一堆
蒼煙收不起。山從陽邛西來青一灣。天公擲下半玉環。大明
湖上一杯酒。昨日繡江睂睫間。晚涼一棹東城渡。水暗荷深
若無路。江妃不惜水芝香。狼藉秋風與秋露。蘭襟鬱鬱散芳
澤。羅韞盈盈見微步。晚晴一賦畫不成。枉著風標誇白鷺。我
時驂鸞追散僊。但見金支翠鞋相後先。眼花耳熱不稱意。高
唱吳歌叩兩舷。喚取樊川搖醉筆。風流聊與付他年。

九月七日夢中作詩續以末後一句

桃花紅淡李花白。昨日成團今日折。歌聲滿耳何處來。楊柳

青旗洛陽陌。拊君背。握君手。朝鐘暮鼓無了期。世事於人竟何有。青青鏡中髮。忽忽成白首。六國印。何如負郭二頃田。千載名不及。卽時一杯酒。

賦邢州鵲山

去時唐山道。望望鵲山背。今朝西北看。奇秀益可愛。蒼茫失層疊。解駁見縈帶。浮雲自來去。盡巧寧變壞。吳妝入小筆。隱隱拂殘黛。城隅靜。女人不知擁髮低。顰如有待。太行橫截九州半。一掩一重俱有態。只知天平六峯天下稀。此山東來亦間在。煙埋雨沒今幾時。殆天所藏子發之。郭熙未足語平遠。摹寫誰有韋郎詩。

送王亞夫舉家歸許昌

一日兩倉藜藿葵。三冬一褐軒與齊。監河貸粟困欲死。望望

江水湔塵泥。故書一束手自攜。汴兒跳梁翠女啼。出門疾走勿反顧。正恐五鬼從之西。馬中豈是無龍媒。世人徒知牝牡黃與驪。只如黃金絡頭亦不惡。誰謂茅索能相羈。天公醉著百不問。汝偶而偶奇而奇。前途兀兀黑於漆。昨日把笏今扶犁。乃知世間倚伏不可料。井底容有青雲梯。春風兩淮多鼓鬣。軍中少年舞荒雞。因君南望一大笑。落日澹澹青山低。

湧金亭示同游諸君

太行元氣老不死。上與左界分山河。有如巨鼇昂頭西入海。突兀已過餘坡陀。我從汾晉來。山之面目腹背皆經過。濟源盤谷非不佳。煙景獨覺蘇門多。湧金亭下百泉水。海眼萬古畱山阿。觴沸灤水源。淵淪晉溪波。雲雷涵鬼物。窟宅深蛟鼉。水妃簸弄明月璣。地藏發泄天不訶。平湖油油碧於酒。雲錦

十里翻風荷。我來適與風雨會。世界三日漫兜羅。山行不得
 山北望空長哦。今朝一掃眾峯出。千鬟萬髻高峩峩。空青斷
 石壁。微茫散煙螺。山陽十月未搖落。翠蕤雲旂相盪摩。雲煙
 故為出濃淡。魚鳥似欲留婆娑。石間僊人迹。石爛迹不磨。僊
 人去不返。六龍忽蹉跎。江山如此不一醉。拊掌笑煞孫公和。
 長安城頭烏尾訛。并州少年夜枕戈。舉杯為問謝安后。蒼生
 今亦如卿何。元子樂矣君其歌。
煙螺舊作煙
 蘿依石本改

南冠行

南冠纍纍渡河關。畢逋頭白乃得還。荒城雨多秋氣重。頽垣
 敗屋淡茅菅。漫漫長夜浩歌起。清涕曉枕留餘漚。曹侯少年
 出紈綺。高門大屋垂楊裏。諸房三十侍中郎。獨守殘編北窗
 底。王孫上客生光輝。竹花不實鷓鴣飢。絲桐切切解人語。海

雲喚得青鸞飛。梁園三月花如霧。臨錦芳華朝復暮。阿京風
 調阿欽才。暈碧裁紅須。小杜長安張敞號。眉嫵吳中周郎知。
 曲誤香生春動一詩成。瑞露靈芝滿窗戶。魚龍吹浪三山沒。
 萬里西風入華髮。無人重典鸕鶿裘。展轉空牀臥秋月。寶鏡
 埋寒灰。鬱鬱萬古不可開。龍劍出地底。青天白日驅雲雷。層
 冰千里不可留。離魂楚些招歸來。生不願朝入省。暮入臺。願
 與竹林嵇阮同舉杯。郎倉猩猩脣。妾倉鯉魚尾。不如孟光案
 頭一杯水。黃河之水天上流。何物可煮人間愁。撐霆裂月不
 稱意。更與倒翻鸚鵡洲。安得酒船三萬斛。與君轟醉太湖秋。

醉後走筆

建茶三盃冰雪香。離騷九歌日月光。腰金更騎揚州鶴。雋永
 不羨大官羊。短燈檠子移近牀。秋風吹簾月轉廊。一歌再歌

魂魄動入眼。渺渺橫沅湘。湘妃漸遠望不及。金支翠蕤澹飛颺。漁父話獨醒。孺子歌滄浪。山鬼獨一脚。拊掌笑我旁。湘纍歸來弔故國。遺臺老樹山蒼蒼。掩書一太息。夜如何其夜未央。東家女兒繡羅裳。銀瓶瀉酒勸客嘗。一酌均跖顏。再酌齊彭殤。宇宙不今古。氣節無陰陽。少年避酒不肖喫。跬步乃有無何鄉。愛茶愛書死不徹。乃以冰炭貯我腸。世間唯有麴生風味不可忘。

南湖先生雪景乘驟圖 并引

南湖先生原武人。年二十許時。曾以鄉賦。兩魁鄭州。然其資倜儻。所以自望者甚高。終不樂爲舉子計。卽棄去學擊刺。當正隆征南。頗欲馳逐戎行間。旣而大定詔書下。兵各罷歸。先生抱利器而無所試。乃浮湛里社。以詩酒自娛。買

田南湖之上。築亭種樹。徜徉乎其間。盡置家事。日與賓客酣飲。歌管棊粟。窮日夕不少休。家故饒財。又好施予。其赴人之急。猶疾痛之在已。故人尤以此歸之。所與游。如臨沼王逸賓。游宗之大定劉之昂。其人皆天下名士。至論人物。必曰靖達卿。今日之奇男子也。先生生於天會初。歷大定。明昌。泰和。優游於太平和樂之世者五十年。大安兵興。乃下世。平生喜作詩。樂府尤有蘊藉。觀西子棄瓢詩可見也。髻鬟蕭蕭。颯芴羅秋。千古香溪水自流。吳越兵爭竟何得。風流輸與五湖舟。嘗雪中騎青驃。行京水道中。作長詩。卒章有安得西都畫史吮筆出新意。寫作南湖老子雪景乘驟圖之句。其子文煒北渡。後來東平。始以先生之意。追畫此圖。求僕賦詩。文煒質直好義。讀書作文。有聲時輩中。觀其子可以想見先生之爲人。故爲道其

事并以致懷賢之思

大河茫茫白連空。寒雲迢迢度南鴻。汴梁高樓管絃裏。成皋
行人西北風。北風吹雪來。飄瞥捲孤蓬。異色變慘澹。元氣開
洪濛。襄陽潮陽詩境在。掇拾物色真難工。青驪誰此游。望見
知是南湖翁。南湖翁少日骯髒。今龍鍾猶能吐氣萬丈如長
虹。閉門兀坐意不愜。要看銀海翻魚龍。寶華世界瓊瑤宮。江
山隨翁入清雄。詩成仰天一大笑。飛花落絮春濛濛。鬱鬱梁
宋郊。翁家出強宗。許與必豪右。收入等侯封。翁年十八九。弄
筆學彫蟲。疊取兩解魁。隱隱何隆隆。一旦拂衣去。學劍事猿
公。正隆適南征。匹馬走從戎。墨瓦磨盾鼻。意與江流東。紫微
出東方。淮海亦來同。都將書與劍。田間就春農。仕宦不作邴
曼容。醉鄉自愛王無功。爰居從渠致鐘鼓。野鶴豈合棲樊籠。

南湖煙景多。魚鳥亦從容。亦有兩小船。綸竿插船蓬。高亭出
秀樾。窗戶連青紅。清飈隨睡興。暝色赴吟筇。門前車馬來。日
釀日不供。但苦佳客少。焉知清興終。看翁棄瓢詩。調戲鴟夷
老子如兒童。雄吞已覺雲夢小。寒縮寧作書生窮。當年我得
奉談笑。晝夜肯放清尊空。東家西家不相從。南海北海不相
逢。風流耆舊今誰似。惆悵相看是畫中。

癸卯歲杏花

南州景氣暖。杏花見紅梅。讀書山前二月尾。向陽杏花全未
開。待開竟不開。怕寒貪睡。嗔人催愛花。被花惱不徹。一日繞
樹空。千回牙牙嬌語。山櫻破稠鬧。成團稀作顆。小蕾從教絳
蠟封。繁枝未要晴雲裏。兩月不舉酒。半歲不作詩。更教古銅
瓶子無一枝。綠陰青子長相思。今年閏年好寒節。花開不妨

遲一月雷船買魚作寒節宋方舟先生李知幾語

題劉紫微堯民野醉圖

蒼苔濁酒同歌呼。白鬢紅頰醉相扶。堯時皇質未全散。不論朝野皆歡虞。望雲雲非雲。就日日非日。先秦迂儒強解事。極口譽堯初未識。堯民與酒同一天。此外更誰為帝力。僊老曾經甲子年。戲將陳迹畫中傳。山川淳樸忽當眼。回望康衢一慨然。不見只今汾水上。田翁鞭背出租錢。堯甲子年仙張果事

贈荅趙仁甫仁甫名復雲夢人江表奇士也

我友高御史。愛君曠以真。昨朝識君面。所見勝所聞。江國辭客多。玉骨無泥塵。軒昂見野鶴。過眼無雞羣。想君夜醉潯陽時。明月對影成三人。散著紫綺裘。草裏烏紗巾。浩歌魚龍舞。水伯不敢嗔。何意醉夢間。失腳墮燕秦。萬世一旦暮。萬里猶

比鄰。世無魯連子。黑頭萬蟻徒紛紛。君居南海我北海。握手一杯情更親。老來詩筆不復神。因君兩詩發興新。都門回首一大笑。袖中知有江南春。

下黃榆嶺

北厓玄武暮。黝黑如積鐵。東厓劫火餘。絢爛開錦纈。就中嶺頭一峯凸。樸奇賸費寒雲幾。千疊摩圍可望不可到。青壁無梯猿叫絕。林煙日射彩翠新。跬步疑有黃金闕。畫工胸次墨汁滿。那得冰壺貯秋月。直須潮陽老筆回萬牛。露頂張顛揮醉帖。石門細路無澗泉。行人飢渴挽不前。辛苦黃榆三十里。豈知卻有看山緣。

驅豬行黃臺張氏莊作

沿山蒔苗多費力。辦與豪豬作糧食。草庵架空尋丈高。擊板

遺山先生集 卷五
搖鈴鬧終夕。孤犬無猛噬。長箭不暗射。田夫睡中時。叫號不似驅豬似。稱屈放教田鼠大於兔。任使飛蝗半天黑。害田爭合到渠邊。可是山中無橡朮。長牙短喙會不休。過處一抹無禾頭。天明隴畝見狼藉。婦子相看空淚流。早乾水溢年年日。會計收成纔什一。資身百備粟豆中。僧石都能幾錢直。兒童會麩須愛惜。此物羣豬口中得。縣吏卽來銷稅籍。

嘯臺感遇

裴回五巖上。浩歌彌激烈。望望蟾房翁。倒影乍明滅。地古足靈異。祠廢餘像設。子規夜啼山竹裂。老鶴亂踏枯松折。嘯臺音響杳不聞。蕩蕩青天一明月。荒山破瓦色十步。九窪疊水泉出沮如。一綫僅不絕。翁乎何意留此居。可是他山無地穴。太道既下衰。日鑿聰明開。玉從珪璋毀。木以青黃災。天和散

不畱去浪無東回。咄咄此老蒼。骯髒仰怪魁。堯年生甲子。含德如未孩。標枝野鹿致足樂。火會屋居良所哀。史筆亦厚誣。何曾校計識與材。纏身正有一丈髮。直以何物觀形骸。大笑黃冠師。金丹羽化之說何從來。豈知大人先生獨立萬物表。太古元氣同胚胎。不見今日孫公和。橫絕四海隘九垓。嵇康養生安在哉。

水簾記異

癸卯九月四日
同杜仲梁賦

黃華絕境探未窮。道人曾約山櫻紅。鏡臺懸流不易得。世俗名取香鑪峯。七年長路今一到。刺鯁欲滿平生胸。豈知早久泉脈絕。快意一濯無由供。神明自足還舊觀。湧浪爭敢微靈通。何因狡獪出變化。勝概轉盼增清雄。天孫機絲拂夜月。佛界珠網搖秋風。稱奇叫絕喜欲舞。恨不百繞青芙蓉。銀橋清

涼顛玉鏡崑工東。世外果無物。邂逅乃一逢。書生眼孔塞易破。勺水已復誇神功。東坡拊掌應大笑。不見蟄窟鞭魚龍。

嶺谷聖鐙 九月五日作

金門寺前山突起。井底寶巖三十里。舊聞聖鐙在山上。紫微侍郎宜不妄。山空月黑無人聲。林間宿鳥時一鳴。游人燒香仰天立。不覺紫煙峯頭一鐙出。一鐙一鐙續一鐙。山僧失喜見未會。金繩脫串珠散迸。玉丸走梓光不定。飛行起伏誰控搏。華麗清圓自殊勝。北荒燭龍開晦冥。南極入地多異星。豈知心光毫相有真運。物外恍惚終難憑。腐儒心魄為動蕩。拜中庭謝靈。既何曾辦作劉更生。下照乃辱青藜杖。昨朝黃華瀑流神所憐。今朝金門佛鐙佛作緣。紛紛世議何足道。盡付馬耳春風前。

會榆莢

露葵滑寒羊蕨羶。春榆作莢絕可憐。榆令人瞑何暇計。田舍年例須濃煎。簫聲吹暖賣餚天。家人鑽火分青煙。長鉤矮藍走童稚。頃刻綠萍堆滿前。炊飯雲子白。翦韭青玉圓。一杯香美薦新味。何必烹龍炮鳳誇肥鮮。鼠肝蟲臂萬化途。神奇腐朽相推遷。夢中鸚鵡亦大樂。隨意飲啄真飛僊。先生捫腹一莞然。此日何功會萬錢。

李峪園亭看雨

龍山右脇松十里。細路蜿蜒繞龍尾。松林迫塞悶煞渠。北望玉泉疑井底。玉泉元自別一天。眼界廓廓無神川。金城百里纔一俯。半尖浮圖插蒼煙。行行下絕巘。招提忽當眼。未到倦不勝。小憩遂忘返。玉泉一杯甘以冽。未須張陸誇冰雪。王人

遺山先生集 卷五
不在客不畱。烈風崖下風颼颼。石頭路滑馬蹏怯。山雨未落
雲先愁。將軍林園永安下。秋霽邨墟絕瀟灑。濃雲厭屋風打
頭。僅得羈銜脫疲馬。只知龍山之神神更神。永安亦能撼詩
人。晦暝變化千萬態。畫出風雨元非真。山靈亦愁歸厚夜。半
面時時見雲罅。天瓢細灑供晚涼。不似草堂回俗駕。層陰一
掃羣峯出。一洗淡青徹山骨。夕陽展放紫翠屏。只欠松梢一
輪月。山中一石回萬牛。況是一壑復一邱。不如一詩招將入
南州。先生興來時臥游。

游龍山

曩予尉大梁。得交此州雷與劉。自聞兩公誇南山。每恨南海
北海風馬牛。老龍面目今日始一見。更信造物工雕鏤。是時
山雨晴。平田綠油油。並山涼氣多。況得通溪幽。山泉谷口出

迎客石罅。戛擊琳琅球。蜿蜒入微行。漸覺藤蘿罨衣樹。打頭
惡木拉颼。棲直幹比指稠。石門無風白日靜。自是林響寒颼
颼。一峯忽當眼。仰看看不休。一峯一峯千百峯。雖欲一一顧
揖。知無由。金城偃蹇不得上。瑤壑回合如相畱。苔花萬錦石
丹碧爛不收。天關守虎豹。武庫開戈矛。小山隨起隨偃。什獨
立千仞。絕頂縹緲之飛樓。百花岡頭藉草坐。瀟灑正值金蓮
秋。亭亭妙高臺。玉斧何年修。登高攬元化。恍如鷹脫鞴。山靈
故爲作開闢。巧與詩境供冥搜。白雲何許來。纖絲弄輕柔。蓬
蓬作霧湧。飄飄與煙浮。玉衣僊人鞭素虬。翕忽變化令人愁。
須臾視六合。浩蕩不可求。初疑陶輪比運臂。今悟夜壑真藏
身。劫石拂未窮。祀國浪自憂。斷鼇立極萬萬古。爭遣起滅如
浮漚。快哉萬里風。一掃天四周。誰言太始再開闢。日馭本自

無停翰。舉手謝山靈。就無清涼。毫相非神羞。賤子貪名山。客刺已屢投。黃華挂鏡臺。天壇避秦溝。太山神明觀。二室汗漫游。胸中隱然復。有此大物。便可揮斥八極。隘九州。玉峯有佳招。絕唱須一酬。爲君探囊擲下珊瑚鉤。白雲相望空悠悠。異時華表見老鶴。姓字莫忘元丹邱。

醉中送陳季淵

寒食不數日。天氣殊未佳。翩翩金門客。行行指龍堆。朝發忻城暮隴頭。隴頭地寒無草芽。拂雲堆邊春更晚。雪花茫茫楊白沙。紆千山高凍。煞雀榆葉離離小。叢薄愛君只欲苦死留。不道南飛何所樂。書生弓馬能幾何。乃今寶校金盤陀。孔璋文筆妙天下。敕勒不數陰山歌。向年賦奇雨。擁海驅雲筆頭。注使如懷素。書布障。狂笑劉又寫冰柱。李汾王鬱俱灰塵。天意乃在潁陽陳。舌吐萬里唾。一世眼高四海空。無人殘民假息。仍瘡痛。誰作東山謝安起。恨我不比長桑君。一月觴君上池水。眼中之人不易忘。誰作冰炭置我腸。衰顏明鏡兩寂寞。別意春江誰短長。但願年年見顏色。與君連日醉壺觴。

送七唐佐還平陽

我從商餘之山過。庵羅聞君六經百家富。研摩會最上指冠巍峩。豈肯俯首春官科。覃懷變生十載後。我時避兵方北走。通家弋宋共有無。行輩許之爲老友。晉州一書君肯來。握手大笑心顏開。春風著人不覺醉。快卷更須三百杯。鶴骨騫飛法當壽。況是丹房藥鏡畱心久。昆侖神泉漭朮芝。乞與餘膏潤衰朽。天府學士登瀛洲。松頂僊人垂直鉤。愛君直欲抵死畱。自言世事非所求。千古黃金鑛中淚。不獨盧仝并馬異。蘇

州韋郎交分淡。香山白傅金玉音。借渠兩詩寫我心。相知非
 不多。但苦心不同。同心一人去。坐覺長安空。離愁何從生。生
 從情愛中。不見行人。拂袖自西東。汾流滔滔。今日千里。青
 眼高歌吾老矣。寶豐山中有庵羅寺。唐佐嘗從程內翰天益問學于此。

游泰山

泰山天壤間。屹如鬱蕭臺。厥初造化手。辦此何雄哉。天門一
 何高。天險若可階。積蘇與累塊。分明見九垓。扶搖九萬里。未
 可誣齊諧。秦皇憺威靈。茂陵亦雄材。翠華行不歸。石壇滿蒼
 苔。古今一俯仰。感極令人哀。是時夏春交。紅綠無邊涯。奇探
 忘登頓。意愜自遲回。惜無賞心人。懽然盡餘杯。夜宿玉女祠。
 崩奔湧雲雷。山靈見光怪。似喜詩人來。雞鳴登日觀。四望無
 氛霾。六龍出扶桑。翻動青霞堆。平生華嵩遊。茲山未忘懷。十

年望齊魯。登臨負吟鞵。孤雲拂層崖。青壁落落雲間開。眼前
 有句道不得。但覺胸次高崔嵬。徂徠山頭喚李白。吾欲從此
 觀蓬萊。

付阿耽誦

昨得商子書。知有阿耽名。今朝見阿耽。驚喜喜復驚。迺翁雅
 望傾漢庭。仕才千石埋九京。我知渠孫不虛生。虎穴生虎子。
 墮地骨骼成。舉頭為城尾為旌。幾人雄猛得寧馨。繡衣青春
 佳御史。路人望見行且止。老夫從旁當說似。前日晦道堂前
 小兒子。雷動風行自應耳。藜藿不采今其始。

唐子達扇頭

此詩舊編入六言今正

溪光冷於冰。山骨淨如玉。白雲自老人。自閒莫遣秋風破茅
 屋。

游承天鎮懸泉 以下續編

詩人愛山愛徹骨。十月東來犯冰雪。懸流百里行不前。但覺
 飛湍醒毛髮。閒閒老仙去久。石壁姓名苔蘚滑。此翁可是
 六一翁。四十三年如電抹。并州之山水所泐。駭浪幾轟山石
 裂。只知晉陽城西天下稀。娘子關頭更奇。周南留滯何敢
 歎。投老天教探禹穴。君不見管涔汾源大車輪。平泉丈八玻
 璃盆。不知承天此水何所本。乃與沈瀆爭雄尊。平地突出隨
 崩奔。洶如頽波射天門。太初元氣未凝結。更欲何處留胚暉。
 素虬騰擲翠蛟舞。袞袞後出皆鱣鯢。雷車怒擊冰雹散。石峽
 峻滑蒼煙屯。憑崖下視心魄動。自媿氣衰筆老勝概過眼無。
 繇吞少東水簾亦瀟灑。珠琲一一明朝暎。陽龍暗滋瑤草活。
 磨石自與蓮湯温。神祠水之泚。儀衛盛官府。頗怪祠前碑。稽

考失莽魯。吾聞允格臺胎宣。汾洮障大澤。自是生有自來歸。
 有所假而自經溝瀆。便可尸祝之。祀典紛紛果何取。子胥鼓
 浪怒未洩。精衛銜薪心獨苦。楚臣百問天不酬。官以誕幻虛
 荒驚聾瞽。自有宇宙有此水。此水懸絲萬萬古。人言主者介
 山氏。且道未有介山之前復誰主。山溪地古自是有神物。不
 假靈真誰敢侮。稗官小說出閭巷。社鼓邨簫走翁媪。當時大
 厓十才子。爭遣李諍鑱陋語。石林六月清無暑。人家青紅溼
 窗戶。射鹿有場魚有浦。好築漕臺俯洲渚。甕面椰瓢挹膏乳。
 醉扶紅袖別吳歌。風雨不憂驚妒女。閑閑公守平定。以大安
 庚午來遊。迄今壬子四
 十三年矣。土俗傳介子推被焚。其妹介山氏。恥兄要君積薪
 自焚。號曰妒女祠。碑大厓中。制官李諍所撰。辭旨殊謬。至有
 百日積薪。一日燒之。之語。鄉社至今以
 百日積薪而焚之。謂之祭妒女云。

為程孫中卿作

繡褥錦爲褱。蘭湯金作盆。名駒出注水。萬馬浮雲奔。參軍愛
友親弟昆。御史風節海內聞。諸郎楚楚皆玉立。王謝定自超
人羣。高樹出大根。源清流不渾。千年雒陽陌。赫赫于公門。外
翁老去住山邨。正要兒童侍酒尊。他日新詩一千首。不愁無
物餉吾孫。

壽張復從道

鎮州城中金粟岡。移來河東萬卷堂。先生弦歌教胄子。子亦
詩禮沾餘芳。齒如編貝髮抹漆。玉樹臨風未二十。爲渠欲作
寫真詩。老我慚無敬齋筆。復也美材具。璞玉未雕飾。良工在
汝心。苦卓與真積。捧檄毛義喜。受杖伯瑜泣。親年當喜懼。寸
晷真尺璧。桓榮家世傳一經。何患不蒙稽古力。綵服庭闈趨
繡衣。霄漢立。但願頤齋壽金石。歲歲年年作生日。

遺山先生集卷之五

遺山先生集卷第六



元張德輝頤齋類次 平定後學張穆頤洲校梓

樂府

天門引

秦王淡居不得近○從破衡成欲誰信○白頭游客困咸陽○憔悴
黃金百斤盡○海中僊人黃鵠舉○大笑人聞爭腐鼠○丈夫何意
作蘇秦○六印才堪警兒女○舌來多爲虛名老○不見阿房淨如
掃○千年虎豹守天門○一日牛羊臥秋草○

蛟龍引

古劍咸陽墓中得○披開青雲見白日○蛟龍地底氣如虹○土花
千年不敢蝕○洪鑪烈焰初騰精○橫海已覺無長鯨○世上元無
倚天手○匣中誰解不平鳴○割城恨不逢相如○佐酒恨不逢朱

虛尚方未入朱雲請盟槃合與毛生俱誰念田文坐中客只將彈鋏嘆無魚

湘夫人詠

木蘭芙蓉滿芳洲白雲飛來北渚遊千秋萬歲帝鄉遠雲來雲去空悠悠秋風秋月沅江渡波上寒煙引輕素九疑山高猿夜啼竹枝無聲墮殘露

湘中詠

楚山鶴鳴風雨秋楚岸猿啼送客舟江山萬古騷人國猿鳥無情也解愁西北長安遠於日憑君休上岳陽樓

孤劍詠

鬱鬱重鬱鬱夜半長太息吟成孤劍詠門外山鬼泣清霜稜稜風入骨殘月耿耿鐙映壁君不見一飢縛壯士僵臥時自

惜黃鵠一舉摩蒼天誰念樊籠束修翼

渚蓮怨

阿溪何許來素面浣風雨寂寞煙中魂依依欲誰語

芳華怨

娃兒十八嬌可憐亭亭裊裊春風前天上僊人玉為骨人間畫工畫不出小小油壁車軋軋出東華金縷盤雙帶雲裾踏雁沙一片朝雲不成雨被風吹去落誰家少年豈無恩澤俟金鞍繡帽亦風流不然典取鸕鶿裘四壁相如堪白頭金谷樓臺悄無主燕子不來花著雨只知環佩作離聲誰向琵琶得私語無情灘鴻翫翠兒有情蜂雄蛺蝶雌勸君滿酌金屈卮明日無花空折枝

後芳華怨

江南破鏡飛上天。三五二八清光圓。豈知汴梁破來一千日。
寂寞菱花仍半邊。白沙漫漫車轆轤。鷓鴣絃中杜鵑哭。塞門
憔悴人不知。枉爲珠娘怨金谷。樂府初唱娃兒行。彈碁局平
心不平。只今雄蜂雌蝶兩不死。老眼天公如有情。白玉搔頭
綠雲髮。玫瑰面脂透肉滑。春風著人無氣力。不必相思解銷
骨。落花絕品姚家黃。揚州銀紅一國香。千圍萬繞看不足。雨
打風吹空斷腸。丹砂萬年藥。金印八州督。不及秦宮一生花
裏活。長門曉夕壽相如。儘著千金買消渴。

結楊柳怨

長樂坡前一杯酒。鄭重行人結楊柳。可憐楊柳千萬枝。看看
盡入行人手。輕煙細雨綠相和。惱亂春風態度多。路人愛是
風流樹。無奈朝攀暮折何。朝攀暮折何時了。不道行人暗中

老素衣。今日洛陽塵。白髮明朝塞城草。柳色年年歲歲青。關
人何事管離情。春風誰向丁寧道。折斷長條莫再生。

秋風怨

碧瓦高梧響疏雨。坐倚薰籠時獨語。守宮一著死生休。狗走
雞飛莫爲女。雲間簫鼓夜厭厭。禁漏誰將海水添。一春門外
羊車過。又見秋風拂翠簾。總把丹青怨延壽。不知猶有竹枝
鹽。

歸舟怨

渡頭楊柳青復青。閨中少婦動離情。只從問得狂夫處。夜夜
夢到洛陽城。南風吹櫓聲。北雁鳴嚶嚶。江流望不極。相思春
草生。

征人怨

遠山先生集

卷六

三

陽泉山莊

瀚海風煙埽易空。玉關歸路幾時東。塞垣可是秋寒早。一夜清霜滿鏡中。

塞上曲

平沙細草散羊牛。一簇征人在戍樓。忽見隴頭新雁過。一時回首望南州。

西樓曲

游絲落絮春漫漫。西樓曉晴花作團。樓中少婦弄瑤瑟。一曲未終坐長嘆。去年與郎西入關。春風浩蕩隨金鞍。今年匹馬妾東還。零落芙蓉秋水寒。并刀不翦東流水。湘竹年年露痕紫。海枯石爛兩鴛鴦。只合雙飛便雙死。重城車馬紅塵起。乾鵲無端爲誰喜。鏡中獨語人不知。欲插花枝淚如洗。

後平湖曲

越女顏如花。吳兒潔如玉。天教並牆居。不著同被宿。美人一笑千黃金。連城不博百年心。樓上牆頭無一物。暮爨朝春一生足。秋風拂羅裳。秋水照紅妝。舉頭見郎至。低頭采蓮房。郎心只如菱刺短。妾意未覺藕絲長。與郎期何許。眼礙同舟女。春波澹澹無盡情。雙星盈盈不得語。十里平湖艇子遲。岸花汀草伴人歸。鴛鴦驚起東西去。唯有蜻蜓接翅飛。

涓川行

涓川道邊日欲西。誰家少婦掩面啼。漫漫長路行不徹。粉綿鏡衣手自攜。自言娼家女。家在梁門東。夫婿輕薄兒。新人不相容。憶初在家時。只辦放嬌慵。耶娘惜女如惜玉。近前細看面發紅。無端嫁作蕩子婦。流落棄擲風埃中。可憐桃李花。顏色嬌蒙茸。朝看花枝好。暮看花枝空。安得明珠三百斛。重簾

復幕圍春風

長安少年行

黃衫少年如玉筆。生長侯門人不識。道逢豪客問姓名。袖把金鞭側身揖。臥駝行橐錦帕蒙。石榴壓漿銀作筒。八月蒼鷹一片雪。五花驕馬四蹄風。日暮新豐原上獵。三更歌舞灞橋東。

黃金行

王郎少年詩境新。氣象慘澹含古春。筆頭僊語復鬼語。只有溫李無他人。天公著詩貧子身。子曾不知乃自神。人間不買詩名用。一片青衫衡霍重。兒貧女富母兩心。何論同袍不同夢。入門喚婦不下機。淚子垢面兒啼飢。君詩只有貧女語。何曾夢見金縷衣。外家翁媪日有語。嫁女書生徒爾爲。昆陽城

下三更酒。醉膽輪困插星斗。一昔詩腸老蛟吼。十尺長人墮車走。所頭不屈三萬言。欲向何門復低首。何人壽我黃金千。使君破鏡飛上天。

隋故宮行

渭川楊柳先得春。二月鶯啼百轉新。長春宮中千樹錦。暖日晴雲思煞人。君王半醉唱吳歌。絳僊起舞顰翠蛾。吳兒謾說曾行樂。三十六宮能幾多。千秋萬古金銀闕。海汲三山一毫髮。繁華夢覺人不知。留得寒螿泣秋月。

解劍行

古劍黑於漆。鬱鬱動星文。摩挲二十年。今日持贈君。長鯨鼓浪三山沒。知君不是泥中物。袖間一卷白猿書。未分持刀買黃犢。肚懷風雲鬱沈沈。慚媿漂母無千金。長安侏儒飽欲死。

萬古不解天公心。北風浩浩吹行客。隴水無聲雪花白。荆卿墓頭秋草乾。擊筑行歌欲誰識。君不見秦相五殺皮。去時烹雞炊展屨。又不見敝裘蘇季子。合從歸來印纍纍。丈夫墮地自有萬里氣。翁忽變化安能知。大冠如箕望吾子。富貴同生亦同死。

征西壯士謠

三十未有二十強。手內虬矛丈八長。總為官家金印大。不怕百死向沙場。捉卻賀蘭山下賊。金鞍繡帽好還鄉。

望雲謠

涉江采芙蓉。芙蓉待秋風。登山采蘭若。蘭若霜早彫。美人亭亭在雲霄。鬱搖行歌不可招。湘絃沈沈寫幽怨。愁心歷亂如曳繭。金支翠蕤紛在眼。春草迢迢春波遠。

望歸吟

塞雲一抹平如截。塞草離離臥榆葉。長城窟澗戰骨寒。萬古牛羊飲冤血。少年錦帶佩吳鉤。獨騎匹馬覓封侯。去時只道從軍樂。不道關山空白頭。北風吹沙雜飛雪。弓絃有聲凍欲折。寒衣昨夜洛陽來。腸斷空閨擣秋月。年年歲歲望還家。此日歸期轉未涯。誰與南州問消息。幾時重拜李輕車。

梁園春五首

車駕遷汴京後作

軍從南去三回勝。雪自東來二尺強。今歲長春多樂事。內家

應舉萬年觴。

長春德陵誕節名

暖入金溝細浪添。津橋楊柳綠纖纖。賣花聲動天街遠。幾處

春風揭繡簾。

上苑春濃晝景閒。綠雲紅雪擁三山。宮牆不隔東風斷。偷送

天香到世間

樓觀沈沈細雨中。出牆花木亂青紅。朱門不解藏春色。燕宿

鶯喧處處通。

雙鳳簫聲隔綵霞。宮鶯催賞玉谿花。誰憐麗澤門邊柳。瘦倚

東風望翠華。龍德宮有玉谿館。麗澤燕都西門名。

揆花詞五首

禁裏蒼龍啟九關。殿前鸚鵡喚新班。沈沈綠樹鞭聲遠。嫋嫋

薰風扇影閒。

浩蕩春風入繡鞍。可憐東野一生寒。皇州花好無人管。不用

新郎走馬看。

六十人中數少年。風流誰占揆花筵。阿欽正使才情盡。猶欠

張郎白玉鞭。李欽用二十七。張夢祥少一歲。又未婚云。

美酒清歌結勝游。紅衣先為渚蓮愁。曲江共說櫻桃宴。不見

西園風露秋。

人物風流見藹然。逼人佳筆已翩翩。龍津春色年年在。莫著

新銜惱必先。

獵城南

翩翩游俠兒。白馬如匹練。朝出城南獵。暮趁軍中宴。北平有

真虎。愛惜腰閒箭。

春風來

春風來時瑤草芳。綠池珠樹宿鴛鴦。春風去後瑤草歇。來鴻

去燕遙相望。鴛鴦不得雙。燕鴻天一方。娟娟愁眉色。靜與遙

山長。錦衾復羅薦。夢語相思怨。月明烏夜啼。空閨淚如霰。

幽蘭

陽泉山莊

蓮山先生集 卷六
僊人來從舜九疑。辛夷爲車桂作旗。疏麻導前杜若隨。披猖
芙蓉散江蘺。南山之陽草木腓。澗岡重複人迹希。蒼厓出泉
懸素霓。翛然獨立風吹衣。問何爲來有所期。歲云暮矣胡不
歸。鈞天帝居清且夷。瑤林玉樹生光輝。自棄中野誰當知。霰
雪慘慘清入肌。寸根如山不可移。雙麋不返夷叔飢。飲芳食
菲尚庶幾。西山高高空蕨薇。露繁無人薦湘纍。山鬼切切雲
間悲。空山月出夜景微。時有彩鳳來雙栖。

梅花

去歲梅花晚。今歲梅花早。和羹要佳賓。春風莫草草。

寶鏡

寶鏡挂秋水。青蛾紅紛妝。春風不相識。白地斷肝腸。

續小娘歌十首

吳兒沿路唱歌行。十五五和歌聲。唱得小娘相見曲。不解
離鄉去國情。

北來游騎日紛紛。斷岸長隄是陣雲。萬落千邨藉不得。城池
留著護官軍。

山無洞穴水無船。單騎驅人動數千。直使今年留得在。更教
何處過明年。

青山高處望南州。漫漫江水遶城流。願得一身隨水去。直到
海底不回頭。

風沙昨日又今朝。踏碎鴉頭路更遙。不似南橋騎馬日。生紅
七尺繫郎腰。

雁雁相送過河來。人歌人哭雁聲哀。雁到秋來卻南去。南人
北渡幾時回。

竹溪梅塢靜無塵。二月江南煙雨春。傷心此日河平路。千里荆榛不見人。

太平婚嫁不離鄉。楚楚兒郎小小娘。三百年來涵養出。卻將沙漠換牛羊。

飢烏坐守草間人。青布猶存舊領巾。六月南風一萬里。若為白骨便成塵。

黃河千里扼兵衝。虞虢分明在眼中。為向淮西諸將道。不須誇說蔡州功。

并州少年行 以下續編

北風動地起。天際浮雲多。登高一長嘯。六龍忽蹉跎。我欲橫江鬪蛟蠱。萬弩迸射陽侯波。或當大獵燕趙間。黃熊朱豹皆遮羅。男兒萬馬隨搗訶。朝發細柳暮朝那。掃雲黑山布陽和。

歸來明堂見天子。黃金橫帶冠峩峩。人生只作張騫傅介子。遠勝僵死空山阿。君不見并州少年夜枕戈。破屋耿耿天塗河。欲眠不眠淚滂沱。著鞭忽記劉越后。拔劍起舞雞鳴歌。東方未明兮柰夜何。

怒虎行 答宋文之

怒虎當道臥。百里不敢嚙。紛紛射彪手。一見弧矢墜。誰知世有李將軍。霹靂弦聲驚戶牖。昨日雙南金。今日綠綺琴。贈君無別物。唯有百年心。

遺山先生集卷第六

遺山先生集卷第七

元張德輝頤齋類次 平定後學張穆廉友校梓

五言律詩

懷益之兄

世故伊川嘆。鄉情越客音。天宜他日定。陸已向來沈。冉冉愁
 看老。源源事益侵。誰言易排遣。自分不勝任。鞭影驚疲馬。鐘
 聲急暮禽。跼中無曠迹。喧外有幽尋。夢失名家筆。書存遺子
 金山田。和石瘦茅屋。過雲淡。春雨蔬成圃。秋霜柿滿林。樹陰
 涼拂席。花氣澹盈襟。宿鷺窺晨汲。孤猿伴暝吟。溪僧時問字。
 野客或知琴。抱璞休奇售。臨觴得緩斟。阿兄團聚日。曾話百
 年心。

沐禪師自斲普照瓦為研以詩見餉為和二首

寺廢瓦不毀。研奇功亦多。已知良斲少。更柰苦心何。挺挺剛
無敵。津津潤可呵。羽陽陵谷變。冰井字書譌。贈比黃金璞。辭
慙紫石歌。遙知玉音在。洗耳俟研磨。長吉有紫石硯歌
點化鉛仍見。堅凝鐵易穿。何年埋朽壤。此日睹青天。古色秋
煙重。哀音夜雨懸。有刀堪切玉。是鏡不名磚。佛廕淪空劫。書
林結後緣。禪河一勺水。更擬就師傳。

惡雨

惡雨惡復惡。龍公何遽然。霆轟冰塔碎。電掣玉繩連。高岸皆
淡谷。層霄一漏泉。黑來疑擁海。白散忽成煙。市饗千門合。湖
頭萬弩穿。天瓢休盡建。枯早有他年。

癸巳除夜

鼎定周元重。薪安漢已然。不隨南渡馬。虛泛北歸船。身並枯

蝸化。心爭脫兔先。塵埃嗟落薄。光景強留連。往事青燈裏。浮
生白髮前。更殘鐘未動。猶屬出京年。

病中

病因食豬動氣而作癸卯
四月二十一日晨起書

戰勝頗自恃。寧知徒外股。文章工作祟。時運迫摧枯。止酒嗟
何及。燒豬本不圖。膏梁無急變。山澤有真臞。詩信藤條戲。方
遭鐵彈誣。鹽紅忘後顧。鰲黑見先驅。眩入投牀仆。晨淹伏枕
呼。萬錢誰嘔泄。一鬻爾乘除。靜伏心仍悸。淡調息亦麤。跼嫌
囚。宇宙渴憶捲江湖。風柳留蟬脫。霜松映鶴孤。養和懲往失。
几名養和事。扶老念時須。杯杓歸神誓。垣牆任佛踰。回谿且
見天。隨子詩。巫翹望或在桑榆。

綦威卿毅挽辭

東海于門舊。桐鄉邑墓遷。綦東海人威卿之祖待
制公知忻州因家焉芝蘭宜有

種珠玉自成淵慈母依鄰切名郎獲譽先豪華非日損信厚
出天然詣理言猶訥持心靜益專笑談千里到咳唾百金捐
論齒推予長垂髫得子賢通家仍孔李知己已與王田刻責誰
斯切推扶取所偏孤嫠平日託昆季再生緣摧割詩寧寫精
微夢或傳都將百年淚一慟夜臺前

老樹

老樹高留葉寒藤細作花沙平時泊雁野迥已攢鴉旅食秋
看盡行吟日又斜干戈正飄忽不用苦思家

陽翟道中

長路伶俜裏羈懷莽蒼中千山分落照萬籟入秋風頻見參
旗縮虛傳朔幕空故園歸未得細問北來鴻

月觀追和鄧州相公席上韻

月觀知名舊池亭發興偏露涼驚夜鶴風細咽秋蟬綠泛兵
厨酒紅依幕府蓮無緣逐清景空羨飲中僊

太室同希顏賦

壯矣崧維岳盤盤上窈冥中天瞻巨鎮元氣有遺形雨入秦
川黑雲開楚岫青鼇掀一柱在萬古壓坤靈

送登封張令西上

罷縣人稱屈悠悠復此行渭城秋雁到秦嶺暮雲平道路衣
從典風塵劍已鳴山西多俠客莫說是書生

方城道中懷山中幽居

技拙違時用年饑與食謀江山貧士歎日月賈胡留楚客頻
招隱文園故倦游衡門有幽事還我北窗秋

孟州夾灘飲承之御史家

同欽叔作

美酒禁愁得。芳梅發興饒。紛紜聊且置。塊磊故須澆。雞黍成
前約。干戈有此宵。平生楊大理。惜不豫佳招。雲卿赴召五日矣

送曹吉甫兼及通甫

意氣羨君豪。憐君屈騎曹。安能事筆硯。且復混弓刀。風雪貂
裘暗。關山馬骨高。南飛見鴻雁。應爲惜哀勞。

勝概三鄉

勝概煙塵外。新詩杖履閒。偶隨流水去。澹與暮雲還。吾道三
緘口。時情一解顏。從今便高臥。已負半生閒。

少室南原

地僻人煙斷。山深鳥語譁。清溪鳴石齒。暖日長藤芽。綠映高
低樹。紅迷遠近花。林間見雞犬。直擬是僊家。

寄贈龐漢茂宏

之子貧居久。詩文日有功。苦心唯我見。高誼許誰同。萬里虎
食肉。一鳴雞長雄。皇天老眼在。且莫怨山中。

洛陽古城曦陽門早出

乘月出曦陽。黎明轉北岡。荒邨自雞犬。長路足豺狼。天地憐
飄泊。風霜憶閉藏。微吟訴行役。淒斷不成章。

聞希顏得英府記室

近得髯參信。知從兔苑游。文星映朱邸。勝概減黃樓。進退存
中道。功名接上流。徒懷貢公喜。塵土隔瀛洲。

落魄

落魄宜多病。艱危更百憂。雨聲孤館夜。草色故園秋。行役魚
鱗尾。歸期烏白頭。中州遂南北。殘息付悠悠。

得姪搏信二首

今日鄜州姪知從虎穴還。百年陰德在幾日鬢毛班。隔闕家
仍遠。羈栖食更艱。誰憐西北夢。依舊繞秦關。
號驛傳家信。坤牛玩吉占。團圓知有望。悲喜亦相兼。過眼書
重展。伸眉酒屢添。關河動高興。百繞望清蟾。

阿千始生

四十舉兒子。提孩聊自誇。夢驚松出筍。兆應竹生花。田不求
千畝。書先備五車。野夫詩有學。他日看傳家。

長壽新居三首 同仲經賦

地古邨墟迴。川回縣郭斜。蒲池餘老節。菊水引新芽。卜築欣
成趣。歸耕覺有涯。迎門顧兒女。今日是山家。
隱去初心在。親朋復此偕。荒田歸別業。高樹表新齋。泉石淡
三逕。風塵限兩崖。青山坐終日。無物寄幽懷。

昔有姜夫子。來家寂寞濱。墓田耕已熟。碑石字猶新。詩酒娛
中歲。山林有外臣。三生可信否。吾亦記前身。
宣和中姜夢得墓陽在焉。夢得曾上書仁宗。既老以詩酒自娛。賜文說地名白鹿原。長壽邨也。

少林雨中

西堂三日雨。氣節變蕭森。偃臥復欹臥。長吟時短吟。鐘魚四
山靜。松竹一鐙深。重羨禪栖客。都無塵慮侵。

十二月六日二首

偃鬼跳梁久。羣雄結構牢。天機不可料。世網若為逃。白骨丁
男盡。黃金甲第高。閭門隔九虎。休續楚臣騷。
海內兵猶滿。天涯歲又新。龍移失魚鼈。日食鬪麒麟。草棘荒
山雪。煙花故國春。聊城今夜月。愁絕未歸人。

得一飛姪安信

音問他鄉隔存心此日知夢中憂凍餒意外脫艱危避地何
嗟及還家敢恨遲衰年吾事了似有鹿門期

短日

短日噫聲急重雲雁影淡風霜侵晚節天地入歸心零落溝
中斷酸嘶爨下音五年朝與夕清血幾沾襟

送母受益自潞府歸崧山

薄俗科名賤孤生志願違正須謀獨往何暇計羣飛泌水真
堪樂荊州況可依青山吾舊隱此日羨君歸

寄程孫鐵安

御史陰功在孫兒玉不如已能騎竹馬想亦愛銀魚異縣關
山闊衡門骨肉疏幾時隨阿舅盡讀外家書

贈汴禪師

道重疑高譽禪枯耐寂寥蓋頭茅一把繞腹篋三條趙子曾
相問馮公每見招風波門外客無事且相饒

己亥元日

五十未全老衰容新又新漸稀頭上髮別換鏡中人野史纔
張本山堂未買鄰不成騎瘦馬還更入紅塵

送楊次公兼簡秦彥容李天成

海國山如染雲堆草易荒時危頻虎穴路絕更羊腸弔影雙
蓬鬢攜家一藥囊殷勤秦與李無惜借餘光

發濟源

早嘆今年劇他鄉底處歸贏糧失先具涉世本無機棄擲烏
皮几裴回白版扉殷勤雙語燕媿汝遠相依

倪莊中秋 己亥

強飯日逾瘦。袂衣秋已寒。兒童謾相憶。行路豈知難。露氣入茅屋。溪聲喧石灘。山中夜來月。到曉不曾看。

荅潞人李唐佐贈詩

聞道嗟子晚。求師愧子賢。泥塗終自拔。璞玉豈虛捐。書破三千牘。詩論二百年。文章有聖處。正脈要人傳。

陽興砦

亂石通樵徑。重岡擁戍城。山川帶淳樸。雞犬見升平。雨爛沙仍軟。秋偏氣自清。年年避營馬。幾向此中行。由州入府。避騎兵。奪馬者多由

此路

懷粹中

醉解不復寐。吟君田舍詩。從知石門老。未比木庵師。日月淹書尺。江山入鬢絲。何因重談笑。卻似少林時。

同周帥夢卿崔振之游七巖定襄七巖

客路頻年別。僧居半日閒。同游盡親舊。舉目是家山。世事風塵外。詩情水石閒。悠然一尊酒。落景未知還。

送崔振之迎家汴梁

老伴不易得。殘年未有閒。桑麻一邨落。雞犬兩柴關。樊守能供酒。周侯許買山。從今釣溪上。日日望君還。

聚僊臺夜飲

永夜留歡席。高懷遠市塵。月涼衣有露。風細酒生鱗。鄉社情親舊。僊臺姓字新。殷勤詩卷在。長記坐中人。

續陽平十愛

我愛陽平酒。兵廚釀法新。百金難著價。一醖即醺人。色笑榴華重。香兼竹葉醇。為君留故事。喚作杏園春。杏園指紀子正家園為言。

送田益之從周帥西上二首

市近廚無肉。書香蠹有蟲。淡居誰不樂。兀坐竟何功。天日伸
眉後。江山洗眼中。蓬萊如可到。賸借玉川風。有所謂

一室盆歌後。供樵只短僮。求凰可無日。牧犢未成翁。桂樹春
風近。揚黃煖律通。明年孟德耀。應與伯鸞東。

九月晦日玉邨道中

水涸沙仍溼。霜餘草更幽。煙光藏落景。山色露清秋。坐食知
何益。行吟只自愁。隨陽見鴻雁。三嘆惜淹留。

十月四日往關南二首

短日晨光澹。高風宿靄激。山寒渾欲雪。水涸劣能冰。振厲時
何有。躋攀倦不勝。哦詩聊自遣。松液已香凝。子方釀松醪當以今日熟故及之

行路見新月。獨行還獨語。勞生塵袞袞。晚色鬢蕭蕭。野曠無
遺穗。林疏有墮樵。回頭麥山嶺。更覺馬蹄遙。

寄王文德新二首

德新時在汝州

沙際春還去。雲頭雨不成。興來誰共醉。事往獨含情。紫邏留
行客。黃流隔戍城。岸花何處在。空憶櫂歌聲。孟津時事

清汝風華地。平生記此游。酒能千日醉。春必萬金酬。攬鏡非
遲暮。逢花儘滯留。只應歌笑處。偏欠李邕州。欽叔時赴邕州幕官

舊國

舊國分崩久。孤兒展省初。客衣留手線。驛傳失肩輿。夢拜悲
兼喜。心飛疾亦徐。殷勤南去雁。先為到商於。

和仲梁

林影兼秋薄。雲陰帶晚涼。石潭魚近藻。沙渚雁留霜。笑語無

長路登臨豈異鄉。一尊堪共醉。惜不是重陽。留霜一作含霜

甲辰夏五月積雨十餘日不止遣悶二首

甲子霖霖雨。巡簷悶不禁。幻泡成實相。水樂激哀音。瘴海聞天漏。堯年見陸沈。騫飛想雲表。癡坐若爲心。南史王景文傳人居貴要但問

心若爲耳

甲子霖霖雨。農郊搏手空。排牆寧有禮。爲壑竟何功。戰蟻侯

王上。鳴蛙意氣中。掃晴應曉夕。少忍待秋風。排牆事見王衍論云排牆之壓

猶有禮也

陽泉樓雲道院

方外復方外。翛然心迹清。開窗納山影。推枕得溪聲。川路遠誰到。石田平可耕。霜林不嫌客。留看錦崢嶸。

劉子中夢庵

寤寐生與死。幻歟爲是真。如何夢中境。不屬覺時人。朝徹從渠夜。形開亦此神。殷勤花上蝶。分我漆園春。

丙午九日詠菊二首

秋菊有何好。祇緣風露清。花中誰比數。霜後獨鮮明。九日惜虛過。一尊還自傾。今年病居士。吟繞更關情。

几案得新供。小窗幽更宜。風霜寧小怯。根撥要淡移。黃素金行正。芳甘藥品奇。三薰復三沐。歲宴與君期。

感事

壯事本無取。老謀何所成。人皆傳已死。吾亦厭餘生。潦倒封侯骨。淹留混俗情。百年堪一笑。辛苦惜虛名。

酬中條李隱君邦彥

州路限南北。相逢今白頭。蟲沙非故國。人物自名流。學道慚

高步留詩惜暗投歸秦如有便終伴竹林游邦彥自關中徒步省其季父子集寧故有竹林之句

送邦彥北行

比數推前輩陪從結後緣川涂卽際隔詩酒重留連白鶴歸華表青牛得老僊秦山好行腳倚杖待明年紫微劉文雅有及中有游秦之興故篇

同冀丈明秀山行

暮景披橫幅山間二老同雲如愁戍苦雪亦笑詩窮古木凍欲折斷崖行復通從今胡谷夢時到水聲中

同姚公茂徐溝道中聯句

路轉川塗闊天低雨氣昏絲山連漢壘汾水入并門公來往頻鞍馬登臨負酒尊聯詩強一笑淒絕恐銷魂之裕

壬子月夕

明月復明月今年還遠遊關河動歸興時節重離憂老眼耿無寐病身偏覺秋遙憐小兒女把酒望東州

庚子三月十日作

殘夢忘書帙餘寒滯酒杯青銅元懶照白紵更寬裁水際詩獨往花邊知幾回殷勤雙語燕應自謝家來

七月十六日送馮揚善提領關中三教

爲愛秦中好西遊日苦遲青雲動高興白首得新知道在貧何病官閒老更宜相思詩酒社無計與追隨

京兆漕司官居三首

符節推通貴江山入勝游名園隨地改高棟與雲浮簿領歸閒暇鶯花接獻酬不知秋夜月何似庾公樓

複嶺雲橫野。孤峯玉柱天。遙知開館日。別破見山錢。夢出紛
華外。詩來寂寞邊。亭中誰舉酒。高興想悠然。
聞說梅軒好。長吟有所思。入簷看瘦影。挂月見橫枝。東閣今
千載。風流彼一時。西游曾有約。到日更題詩。

甲寅正月二十三日故關道中三首

雪。爛。不。得。過。陽。坡。如。見。留。林。煙。常。暗。淡。木。葉。自。颼。颼。齒。髮。悲
行。役。鶯。花。惜。舊。游。塵。埃。與。風。雨。看。待。幾。時。休。
千。里。不。易。到。三。冬。須。少。留。居。情。猶。晉。產。去。意。已。雕。正。遠。出。每
為。苦。雄。夸。還。自。羞。君。心。未。肯。在。應。待。肯。時。休。
六。十。復。半。十。年。年。添。白。頭。祇。知。詩。遣。興。未。覺。酒。忘。憂。人。七。因
循。過。元。宵。塊。坐。休。殷。勤。行。記。上。今。日。是。東。州。

送閻子實焦和之北上

秦府賢初聚瀛州。路不遙。謨謀在廊廟。物色到漁樵。布褐豈
終隱。旌車行見招。春風兩黃鵠。老眼看雲霄。

庫城

浩浩庫城水。岸高知幾尋。疏林護懸險。絕壁入清深。跼步無
曠迹。勞歌惟苦音。年年一來此。老我亦何心。

婁生北上

并府虛荒久。大城如廢邨。草茅知世故。泉壤隔天閭。六月甘
霖浹。一言陰理存。明年佩符節。知有奉春孫。

遣興

几案滿書史。欣然忘百憂。一篇詩遣興。三醖酒扶頭。千載陶
元亮。平生馬少游。但留強健在。老矣復何求。

八月并州雁三鄉時作

八月并州雁清汾照旅羣一聲驚晚笛數點入秋雲滅沒樓中見哀勞枕畔聞南來還北去無計得隨君

示白誠甫

之子吟爆竹迺公欣樹萱崑山多美玉江水發初源名教有樂地詩書皆雅言通家吾未老倚杖望高軒

甲寅十二月四日出鎮陽寄宰魯伯

滹水曉光動灞橋詩境同衝寒騎瘦馬認影識衰翁長路風聲裏孤城雪意中回頭歌笑處淒絕意何窮

送文生西行

今夜東山月隨人知幾程從軍少年事分守故鄉情渭水風露早秦川煙樹平相招有僊掌無計與君行

乙卯十一月往鎮州

邨靜鳥聲樂山低雁影遙野陰時澗朗冷雨只飄蕭涉遠心先倦衝寒酒易消紅塵忘南北渺渺見長橋

挽趙參謀二首以下係續編

偃息參戎幕敦龐一褐寬儒宮新俎豆賓榻老衣冠石動心寧轉河清笑自難殷勤題畫像留與後生看一木留作典刑看篇什中州選兵閒僅補完風人定誰采墨本賴君刊雅道湮沈易幽光發越難高門有孫息玉立看儒冠

嗣侯大總管哀挽二首

北俗資財勁將軍迴不羣賓筵推雅量戰艦望奇勳運隔黃圖日神馳紫塞雲祇應吳季子拊樹惜徐君倚伏難前料乘除忌早成老親如宿昔世德見哀榮劔鬱雙龍氣碑留九虎名感歌凡幾解千載賁佳城

荅七唐佐 魯山人有志道學

遭亂無安地。分憂得若人。鄉鄰存世譜。骨肉到情親。信默餘天粹。咀嚙有道真。懷哉沂水上。同詠舞雩春。

不寐

不寐復不寐。悲吟如自讎。鷄栖因失曉。蟲語苦爭秋。日月虛行。橐風霜入敝裘。誰憐庾開府。直欲賦澆愁。

送楊叔能東之相下

海內楊司戶。聲名三十秋。文高徒自苦。食盡與誰謀。老檜風霜飽。芳蘭澗壑幽。東游無可慮。敬客有蕭侯。

遺山先生集卷第七

遺山先生集卷第八

元張德輝頤齋類次 平定後學張穆申齋校梓

七言律詩

秋懷 崧山中作

涼葉蕭蕭散雨聲。虛堂浙浙掩霜清。黃華自與西風約。白髮先從遠客生。吟似候蟲秋更苦。夢和寒鵲夜頻驚。何時戶嶺關頭路。一望家山眼暫明。

帝城二首 史院夜直作

帝城西下望孤雲。半廢晨昏媿此身。世俗但知從仕樂。書生只合在家貧。悠悠未了三千牘。碌碌翻隨十九人。預遣兒書報歸日。安排雞黍約比鄰。

羈懷鬱鬱歲駸駸。擁褐南窗坐晚陰。日月難淹京國久。雲山

惟覺玉華淡鄰邨爛漫雞黍局野寺荒涼松竹林半夜商聲入寥廓北風黃鵠起歸心

僕射陂醉歸即事

多生曾得江湖樂每見陂塘覺眼明詩酒共尋前日約風陰新自夜來晴春波澹澹沙鳥沒野色荒荒煙樹平醉踏扁舟浩歌起不須紅袖出重城是日招樂府不至

春日

里社春盤巧欲爭裁紅暈碧助春情忽驚此日仍為客卻想當年似隔生貧裏蠶鹽憐節物亂來歌吹失歡聲南州剩有還鄉伴戎馬何時道路清歐陽詹春盤賦裁紅暈碧巧助春情為韻

橫波亭

為青口帥賦

孤亭突兀插飛流氣壓元龍百尺樓萬里風濤接瀛海千年

豪傑壯山正疏星澹月魚龍夜老木清霜鴻雁秋倚劍長歌一杯酒浮雲西北是神州

野菊座主閑閑公命作

柴桑人去已千年細菊斑斑也自圓其愛鮮明照秋色爭教狼藉臥疏煙荒畦斷新霜後瘦蝶寒蟬晚景前只恐春叢笑遲暮題詩端為發妍

度太白嶺往昆陽

斷崖絕壁裂蒼頑竟日長林窈窕閒舊許煙霞歸白髮悔隨塵土出青山飢蠶澌澌催人老野鶴昂昂羨汝閒畏景方隆路方永南風回首暮雲還

寄希顏二首

後一首希顏在徐州幕時作

僵臥崧丘七見春南餘歸計一塵新悠悠華屋高賢意兀兀

田夫野老身動色。雲山如有喜。忘機鷗鳥亦相親。羸疏潦倒
今如此。樓上元龍莫笑人。

湖海故人仍騎曹。彭門千里入憑高。山頭杜甫長年瘦。樓上
元龍先日豪。水落魚龍失歸宿。天長鴻雁獨哀勞。酒船早晚
東行辦共舉。一杯持兩螯。

懷孟之兄時在閩鄉

牢落關河雁一聲。干戈滿眼若為情。二年浪走空皮骨。四海
相望只弟兄。黃耳定從秋後到。白頭新自夜來生。西樓日日
西州道。欲賦窮愁竟不成。

昆陽二首

古木荒煙集暮鴉。高城落日隱悲笳。并州倦客初投迹。楚澤
寒梅又過花。滿眼旌旗驚世路。閉門風雪羨山家。忘憂只有

清尊在。暫為紅塵拂鬢華。

去日黃花半未開。南來忽復見寒梅。淹留歲月無餘物料。理
塵埃。有此杯老馬長途良德矣。白鷗春水亦悠哉。商餘說有
滄洲趣。早晚乾坤入釣臺。

寄西溪相禪師

青鏡流年易擲梭。壯懷從此即蹉跎。門堪羅雀仍未害。釜欲
生魚當柰何。萬事自知因嬾廢。一官元不校貧多。拂衣明日
西溪去。且放雲山入浩歌。

葉縣雨中時崧前早尤甚

春旱連延入麥秋。今朝一雨散千憂。龍公有力回枯槁。客子
何心歎滯留。多稼卽看連楚澤。歸雲應亦到崧丘。兵塵浩蕩
乾坤滿。未厭明河拂地流。

寄荅趙宜之兼簡溪南詩老

窗影靡靡納暝陰。風聲浩浩急霜砧。秋鴻社燕飄零夢。潁水
崧山去住心。黃菊有情留小飲。青燈無語伴微吟。故人憔悴
蓬茅晚。料得老懷如我今。

潁亭

潁上風煙天地回。潁亭孤賞亦悠哉。春風碧水雙鷗靜。落日
青山萬馬來。勝概消沈幾今昔。中年登覽足悲哀。遠游擬續
騷人賦。所惜悠悠無酒杯。

山中寒食

小雨斑斑浥曙煙。平林簇簇點晴川。清明寒食連三月。潁水
崧山又一年。樂事漸隨花共減。歸心長與雁相先。平生取有
登臨興。百感中來只慨然。

楚漢戰處

同欽叔賦

虎擲龍拏不兩存。當年曾此賭乾坤。一時豪傑皆行陣。萬古
河山自壁門。原野猶應厭膏血。風雲長遣動心魂。成名豎子
知誰謂。擬喚狂生與細論。

懷叔能

別卻楊侯又一年。西風每至輒淒然。酒官未得高安上。詩印
空從吏部傳。三沐三薰知有待。一鳴一息定誰先。黃塵憔悴
無人識。今在長安若箇邊。

留別仲澤

避俗無機日見侵。逐貧不去巧相尋。半生與世未嘗合。前日
入山唯不淡。綠水紅蓮慙大府。清泉白石識初心。相思命駕
非君事。能寄詩來或賞音。

鄭州上致政賈右丞相公時被命就公訪先朝逸事

黃閣歸來履舄輕。天將五福畀康寧。四朝人物推耆舊。萬古清風在典刑。鄭圃亦能知有道。漢庭久欲訪遺經。帝城此後瞻依近。長傍孤南候極星。

寄荅景玄兄

故人相念不相忘。頻著書來約對牀。甚喜樵夫與爭席。所憂簿吏復登堂。春風和氣隨詩到。洛水秦山引興長。奮袖高談夜窗白。幾時危坐聽琅琅。簿吏復登堂李長吉語景玄去歲大為催科所困

寄辛老子

草堂西望渺煙霞。夢寐西南一徑斜。為羨鸞皇安枳棘。悔將猿鶴入京華。百錢卜肆成都市。萬古詩壇子美家。後日從翁問奇字。可能逋客待侯巴。

後灣別業

薄雲晴日爛烘春。高柳清風便可人。一飽本無華屋念。百年今見老農身。童童翠蓋桑初合。澹澹蒼波麥已勻。便與溪塘作盟約。不應重遣濯纓塵。

劉丈仲通哀挽

拙宦淡辜遠業期。無兒更結下泉悲。溫純如此豈復見。報施言之尤可疑。四葉名家今日盡。百年潛德幾人知。元劉交分平生重。才薄猶堪第二碑。

會善寺

白塔沈沈插翠微。魏家宮闕此餘基。人生富貴有遺恨。世事廢興無了期。勝概只今歸鷺嶺。煙花從昔繞龍墀。長松想是前朝物。及見諸孫賦黍離。

寄欽用

顛賴京華首藉槃。南山歸興夜漫漫。長門有賦人誰買。坐榻
無羶客亦寒。蟲臂偶然煩造物。驢頭何者亦求官。故人東望
應相笑。世路羊腸乃爾難。

楊之美尙書挽章

冠蓋龍門此日空。人知麟出道將窮。景星明月歸天上。和氣
春風在眼中。千古孫劉有餘責。一時燕許更誰同。受恩知己
無從報。獨為斯文泣至公。

李屏山挽章二首

世法拘人蝨處禪。忽驚龍跳九天門。牧之宏放見文筆。白也
風流餘酒尊。落落久知難合在。堂堂先有不亾存。中州豪傑
今誰望。擬喚巫陽起醉魂。

談塵風流二十年。空門名理孔門禪。諸儒久已同堅白。博士
真堪補太玄。孫況小疵良未害。莊周陰助恐當然。遺編自有
名山在。第一諸孤莫浪傳。

內鄉縣齋書事

吏散公庭夜已分。寸心牢落百憂薰。催科無政堪書考。出粟
何人與佐軍。飢鼠繞牀如欲語。驚鳥啼月不堪聞。扁舟未得
滄浪去。慚愧春陵老使君。
遠祖次山春陵行云思欲委符節
引竿自刺船。故子美有興含滄浪
清之句。

自菊潭丹水還寄崧前故人

臘雪春泥晚未乾。馬迎殘照入荒寒。初無鳧鳥將安往。正有
牛刀恐亦難。倦客不知歸路遠。孤城惟覺暮山攢。黃金鍊出
相思句。寄與同聲別後看。

被檄夜赴鄧州幕府

幕府文書鳥羽輕。敝裘羸馬月三更。未能免俗私自笑。豈不懷歸官有程。十里陂塘春鴨鬧。一川桑柘晚煙平。此生只合田間老。誰遣春官識姓名。

馬鄧驛中大雨

萬壑千巖一雨齊。先聲噴薄捲湍溪。投林鳥雀不暇顧。移穴蛟龍應自迷。便恐他山藏厚夜。豈知高樹有晴霓。兩江合向東南鬪。坐想風雲入鼓鼙。馬鄧西南兩浙水相合處也。

除夜

一燈明暗夜如何。夢寐衡門在澗阿。物外煙霞玉華遠。花時車馬洛陽多。折腰真有陶潛興。扣角空傳甯戚歌。三十七年今日過。可憐出處兩蹉跎。

鄧州相公命賦喜雨

輕陰十日暮春前。和氣朝來已沛然。河潤定應連上國。雲來端合自中天。帥從洛陽移鎮。烽零帶溼閒幽障。麥壠分清入廢田。共識使君霖雨手。調元消息在今年。

劉光甫內鄉新居

鳧冠平日凜秋霜。老去聲名自閉藏。父老漸來同保社。兒童久已愛文章。蔬隨隙地皆成圃。竹放新梢欲過牆。為向長安舊遊道。世閒元有北窗涼。

西齋夜宴

飄零無物慰天涯。酒伴相逢飲倍加。悞謬君當略彭澤。回旋我亦笑長沙。金釵醉彈迎春髻。銀燭光搖半夜花。只欠東山游錄事。不來堅坐看紛譁。叔能信之張社諸人皆在而麟之獨不至。

十月

十月長年見蚤梅。今年二月未全開。春寒春暖花如故。年去年來老漸催。大藥誰傳軒后鼎。習僊虛築漢宮臺。憑君撥置人間事。不負浮生只此杯。

送吳子英之官東橋且爲解嘲

柴車歷鹿送君東。萬古書生蹭蹬中。良醞暫留王績醉。新詩無補玉川窮。駒陰去我如決驟。蟻垤與誰爭長雄。快築糟丘便歸老。世間馬耳過春風。

張主簿草堂賦大雨

浙樹蛙鳴告雨期。忽驚銀箭四山飛。長江大浪欲橫潰。厚地高天如合圍。萬里風雲開偉觀。百年毛髮凜餘威。長虹一出林光動。寂歷邨墟空落暉。

丹霞下院同仲澤鼎玉賦

時從商帥軍至南陽

鞍馬怱怱去復還。霜鐘今得見豐山。千年香火丹霞老。滿眼興亡白水閒。壯志自憐消客路。深居誰得似禪關。只應頻有西來夢。夜夜青林杳靄閒。

春日半山亭游眺

日照春山花滿煙。獨攜尊酒此江邊。江流衮衮望不極。世事悠悠私自憐。小草不妨懷遠志。芳蘭誰爲發幽妍。千年石壁留詩在。會有騷人一慨然。

別程女

芸齋浙浙掩霜寒。別酒青鐙語夜闌。生女便知聊寄託。中年尤覺感悲歡。松間小草栽培穩。掌上明珠棄擲難。明日緱山東畔路。野夫懷抱若爲寬。

出山

松門石路靜無關。布韉青鞋幾往還。少日漫思為世用。中年直欲伴僧閒。塵埃長路仍回首。升斗微官亦強顏。休道西山不留客。數峯如畫暮雲閒。

謝鄧州帥免從事之辟

憂端擾擾力難任。世事駸駸日見臨。三載素冠容有媿。一時墨經果何心。首正自擬終殘喘。陟屺誰當辨苦音。遙望朱門涕橫落。相公恩德九泉深。

新野先主廟次鄧帥韻

一軍南北幾扶傷。長坂安行氣已王。豪傑盡思為漢用。江山初不假吳強。兩朝元老心雖壯。再世中興事可常。寂寞永安宮畔土。爭教安樂似山陽。

石門

兩厓橫絕倚山垠。草徑低迷劣可分。潭影乍從明處見。竹香偏向靜中間。石林萬古不知暑。茅屋四鄰惟有雲。杖行歌羨樵叟。此生何許得隨君。

獨峯楊氏幽居

邨墟瀟灑帶新晴。落日千山一片青。世外衣冠存太樸。雲間雞犬亦長生。清江兩岸多古木。平地數峯如畫屏。惆悵朝陽一茅屋。酒船茶竈負生平。

渡湍水

悠悠人事眼中新。悄悄孤懷百慮紛。伎倆本宜閒處著。姓名誰遣世間聞。秋江澹沲如素練。沙浦空明行暮雲。蚤晚扁舟載煙雨。移家來就野鷗羣。

十日登豐山

十日登高發興新。豐山孤秀出塵氛。邨墟帶晚鴉噪合林壑。得霜煙景分。芳臭百年隨變滅。短長千古只紛紛。詩成一嘆無人會。白水悠悠入暮雲。

岐陽三首

突騎連營鳥不飛。北風浩浩發陰機。三秦形勝無今古。千里傳聞果是非。偃蹇鯨鯢人海涸。分明蛇犬鐵山圍。窮途老阮無奇策。空望岐陽淚滿衣。
百二關河草不橫。十年戎馬暗秦京。岐陽西望無來信。隴水東流聞哭聲。野蔓有情縈戰骨。殘陽何意照空城。從誰細向蒼蒼問。爭遣蚩尤作五兵。
眈眈九虎護秦關。懦楚孱齊机上看。禹貢土田推陸海。漢家

封微盡天山。北風獵獵悲笳發。渭水瀟瀟戰骨寒。三十六峰長劍在。倚天僊掌惜空閒。

圍城病中文學相過

擾擾長衢日往回。病中聊得避喧埃。愁多頓覺無詩思。計拙惟思近酒杯。潘岳鏡中渾白髮。江淹門外即蒼苔。生涯若被旁人問。但說經年鼠不來。

讀靖康僉言

浚郊沙海浩茫茫。河廣纔堪一葦航。顛沛且當懲景德。規模何必罪朱梁。滄溟不掩蛟龍窟。大地同歸雀鼠鄉。三百年間幾降虜。長星無用出光芒。

雨後丹鳳門登眺

絳闕遙天霽景開。金明高樹晚風回。長虹下飲海欲竭。老雁

叫羣秋更哀。劫火有時歸。變滅神。嵩何計得飛來。窮途自覺無多淚。莫傍殘陽望吹臺。

京居辛卯八月六日作

四壁秋蟲夜語低。南窗孤客枕頻移。野情自與軒裳隔。旅食難堪日月遲。平子歸田元有約。魏舒襍被恐無期。一莖白髮愁多少。慚媿家人賦展屣。

浩然師出圍城賦鶴詩為送

夢寐西山飲鶴泉。羨君歸興渺翩翩。昂藏自有林壑態。飲啄暫隨塵土緣。遼海故家人幾在。華亭清唳世空憐。明年也作江鷗去。水宿雲飛共一天。

追用座主閑閑公韻上致政馮內翰一首

峻坂平生幾疾驅。歸休甫及引年初。東門太傅多祖道。北闕

詩人休上書。阜樞老歸千里驥。白雲間釣五溪魚。非熊有兆公無恙。會近君王六尺輿。

草堂人物列僊臞。萬壑松風酒一壺。少日打門無俗客。老年爭席有樵夫。巨源不入竹林選。元亮偶成蓮社圖。野史他年傳者舊。風流一一似公無。

懷秋林別業

茅屋蕭蕭浙水濱。豈知身屬洛陽塵。一家風雪何年盡。二頃田園入夢頻。高樹有巢鳩笑拙。空牆無穴鼠嫌貧。西南遙望腸堪斷。自古虛名只誤人。

壬辰十二月車駕東狩後即事五首

翠被怱怱見執鞭。戴盆鬱鬱夢瞻天。只知河朔歸銅馬。又說臺城墮紙鳶。血肉正應皇極數。衣冠不及廣明年。何時真得

攜家去萬里秋風一釣船

慘澹龍蛇日鬪爭千戈直欲盡生靈高原水出山河改戰地
風來草木腥精衛有冤填瀚海包胥無淚哭秦庭并州豪傑
今誰在莫擬分軍下井陘

鬱鬱圍城度兩年愁腸飢火日相煎焦頭無客知移突屯足
何人與共船白骨又多兵死鬼青山元有地行倦西南三月
音書絕落日孤雲望眼穿

萬里荆襄入戰塵汴州門外卽荆榛蛟龍豈是池中物蟣蝨
空悲地上臣喬木他年懷故國野煙何處望行人秋風不用
吹華髮滄海橫流要此身

五雲宮闕露盤秋銀漢無聲桂樹稠復道漸看連上苑戈船
仍擬下揚州曲中青冢傳新怨夢裏華胥失舊遊去去江南

庾開府鳳皇樓畔莫回頭

永寧南原秋望

浩浩西風入敝衣茫茫野色動清悲洗開塵漲雨纔定老盡
物華秋不知烽火苦教鄉信斷粘聲偏與客心期百年人事
登臨地落日飛鴻一線遲

中秋雨夕

商帥國器
筵中作

南樓高興在胡牀十日秋陰負一觴庾老未應妨嘯詠素娥
多自怨昏黃此生此夜不長好行雨行雲有底忙卻恐哦詩
太愁絕且燒銀燭看紅妝

癸巳四月二十九日出京

塞外初捐宴賜金當時南牧已駸駸只知灞上眞兒戲誰謂
神州遂陸沈華表鶴來應有語銅鞮人去亦何心興亡誰識

天公意留著青城閱古今國初取宋於青城受降

喜李彥深過聊城

圍城十月鬼為鄰異縣相逢白髮新恨我不如南去雁羨君
獨是北歸人言詩匡鼎功名薄去國虞翻骨相屯老眼天公
只如此窮途無用說悲辛

與張杜飲

故人寥落曉天星異縣相逢覺眼明世事且休論向日酒尊
聊喜侶承平山公倒載羣兒笑焦遂高談四座驚轟醉春風
一千日愁城從此不能兵

秋夕

小簾涼多睡思清一窗風雨送秋聲頻年但覺貂裘敝萬古
何曾馬角生寄食且依嚴尹幕附書誰往鄧州城澆愁欲問

東家酒恨殺寒雞不肖鳴

夢歸

顛顛南冠一楚囚歸心江漢日東流青山歷歷鄉國夢黃葉
瀟瀟風雨秋貧裏有詩工作祟亂來無淚可供愁殘年兄弟
相逢在隨分齏鹽萬事休

白屋

白屋寒多愛夕曛靜中歸思益紛紛長門誰買千金賦祖道
虛傳五鬼文地盡更無錐可置竈間唯覺井長勤明年准擬
萊蕪住寄謝東鄰范史雲

淮右

淮右城池幾處存宋州新事不堪論輔車謾欲通吳會突騎
誰當擣薊門細水浮花歸別澗斷雲含雨入孤邨空餘韓偓

傷時語留與纍臣一斷魂

徐威卿相過留二十許日將往高唐同李輔之贈別二

首

衣冠八座文昌府。襜被三年同舍郎。蕩蕩青天非向日。蕭蕭
春色是他鄉。傷時賈誼頻流涕。臥病王章自激昂。保社追隨
有成約。不應關塞永相望。

東南人物未彫零。和氣春風四座傾。但喜詩章多俊語。豈知
談笑得新名。二年阻絕干戈地。百死相逢骨肉情。別後相思
重回首。杏花尊酒記聊城。

卽事

逆豎終當鱗縷分。揮刀今得快三軍。燃臍易盡嗟何及。遺臭
無窮古未聞。京觀豈當誣翟義。衰衣自合從高勳。秋風一掬

孤臣淚。叫斷蒼梧日暮雲。

望王李歸程

一褐霜寒晚思孤。眼中行李見歸途。虞卿仲子死不朽。戶父
晏嬰今豈無。義士龍沙元咫尺。纍臣駒隙自舒徐。何時斗酒
歡相勞。驚看燕家頭白烏。

秋夜

九死餘生氣息存。蕭條門巷似荒邨。春雷謾說驚坯戶。皎日
何曾入覆盆。濟水有情添別淚。吳雲無夢寄歸魂。百年世事
兼身事。尊酒何人與細論。

甲午除夜

暗中人事忽推遷。坐守寒灰望復然。已恨太官餘麪餅。爭教
漢水入膠船。神功聖德三千牘。大定明昌五十年。甲子兩周

今日盡空將。衰淚灑吳天。
乙未正月九日立春
十度新正九處家。今年癡坐轉堪嗟。一冬殘雪不消盡。連日苦寒殊未涯。重碧總誇燕市酒。小紅誰記上林花。殘魂零落今無幾。乞與春風惱鬢華。

杏花落后分韻得歸字

懶髓能醫病。頰肥鸞膠無。那片紅飛殘。陽淡淡不官下。流水溶溶何處歸。煮酒青林寒食過。明妝高燭賞心違。寫生正有徐熙在。漢苑招魂果是非。

三僊祠

三僊祠下往來頻。憔悴征衫滿路塵。簫鼓未休寒食酒。樵蘇時見舊都人。吹殘芳樹紅仍在。碾破平田綠已勻。西北并州

隔千里。幾時還我故鄉春。

送輔之仲庸還大梁

驂騑爭道渺翩翩。誰遣風塵失壯年。四壁舊聞懸磬宅。一囊今有賣書錢。淋浪別酒青燈夜。滅沒孤帆落照邊。想得還家過春半。故山喬木滿蒼煙。

繡江汎舟有懷李郭二公

荷花如錦水如天。狼藉秋香擁畫船。長白風煙取瀟灑。外臺賓主重留連。勝遊每恨隔千里。樂事便當論百年。咫尺西州兩詩客。不來同作飲中僊。

送杜子

洛陽塵土化緇衣。又見孤雲著處飛。北渚曉晴山入座。東原春好妓成圍。來鴻去燕三年別。淡谷高陵萬事非。轟醉春風

遺山先生集 卷八
有成約可能容易話東歸

眼中

眼中時事益紛然。擁被寒窗夜不眠。骨肉他鄉各異縣。衣冠今日是何年。枯槐聚蟻無多地。秋水鳴蛙自一天。何處青山隔塵土。一庵吾欲送華顛。

送杜招撫歸西山

杜亂後爲黃冠師

少日先聲懾虎貔。只今騎馬欲雞栖。邯鄲枕上人初覺。秋水篇中物已齊。父老樵漁知有社。將軍桃李自成蹊。因君喚起思鄉意。君在西山我更西。

寄欽止李兄

征車南北轉秋蓬。關塞相望兩禿翁。袞袞便當隨世路。悠悠難復倚天公。銅駝荆棘千年後。金馬衣冠一夢中。尊酒雲州

古城下。幾時攜手哭春風。

有寄

飛鴻來處是營平。喜向斜封見姓名。千里呂安思叔夜。五更殘月伴長庚。關河秋興風景暮。長路渴心塵土生。南渡詩人吾未老。幾時同醉鳳皇城。

鎮州與文學百一飲

翁仲遺墟草棘秋。蒼龍雙闕記神州。只知終老歸唐土。忽漫相看是楚囚。日月盡隨天北轉。古今誰見海西流。眼中二老風流在一醉。從教萬事休。

別王使君丈從之

謝公每見皆名語。白傅相看只故情。尊酒風流有今夕。玉堂人物記升平。太山北斗千年在。和氣春風四坐傾。別後殷勤

更誰接○只應偏憶老門生○

寄汴禪師師舊隱濟源

白頭歲月坐詩窮○止有相逢一笑同○齋粥空疏想君瘦○冠巾收斂定誰公○夢魂歷歷山間路○世事悠悠耳外風○見說懸泉好薇蕨○草堂知我是鄰翁○時汰逐糶老家甚急故有巾冠收斂之句

衛州感事二首

神龍失水困蜉蝣○一舸倉皇入宋州○紫氣已沈牛斗夜○白雲空望帝鄉秋○劫前寶地三千界○夢裏瓊枝十二樓○欲就長河問遺事○悠悠東注不還流○

白塔亭亭古佛祠○往年曾此走京師○不知江令還家日○何似湘纍去國時○離合興亡遽如此○栖遲零落竟安之○太行千里青如染○落日闌干有所思○落日一作獨凭

望蘇門

諸父當年此往還○客衣塵土淚斑斑○太行秀發眉宇見○老阮心來尊俎間○出岫暮雲歸有處○投林孤鶴杳難攀○湧金亭上秋如畫○興在青林杳靄間○

遺山先生集卷第八

遺山先生集卷八第七

